

BH BUSINESS INFO

Online Izdanje APBiH/UPFBiH

Broj 4, Mart 2011.

Izlazi mjesечно

- ▶ Održana X redovna Skupština UPFBiH
- ▶ Razgovor sa Elizabetom Josipović, vlasnicom kompanije Scontoprom
- ▶ Potpisani Sporazum o izmjeni Sporazuma o osnivanju Ekonomsko-socijalnog vijeća (ESV) za teritorij Federacije BiH





Poštovani čitaoci,

Nekoliko veoma važnih događaja koji su se desile u mjesecu martu među kojima su ratna događanja u Libiji, formiranje zakonodavne i izvršne Vlasti u Federaciji BiH, poslovni susreti slovenačkih i bosansko-hercegovačkih privrednika, otpočinjanje projekta BOSPIM IV Bussineseuropa, X redovna Skupština Udruženja poslodavaca Federacije BiH.

Svjesni posljedica koje će na naša preduzeća koja rade na realizaciji velikih građevinskih projekata u Libiji kao i na preduzeća koja imaju poslovne angažmane na izvozu u ovu zemlju koja spade u red zemalja s kojima BiH kompanije imaju razvijenu privrednu saradnju obavili smo razgovore i intervjuje sa predstavnicima nekih od velikih kompanija i zaključili da pitanja rješavanja njihovih problema moramo uvrstiti u dnevni red Sjednice Ekonomsko-socijalnog Vijeća Federacije BiH.

Uspjeli smo u saradnji sa Vladom i Sindikatom na prvoj sjednici ESV-a u novom sazivu obaviti raspravu o svim mogućim modalitetima podrške i pomoći našim firmama, a o zaključcima ćemo vas obavjestiti nakon što Vlada Federacije razmotri šta će u okviru svojih nadležnosti odlučiti.

Kontaktirali smo i Bussineseurope i tražili informacije o mogućnostima da se Bosna i Hercegovina u svojstvu zemlje potencijalnog kandidata za članstvo u Uniji obrati za pomoć i podršku u rješavanju negativnih posljedica rata u Libiji.

U saradnji sa Bussineseuropom pokrenut je projekat Bospim IV u okviru kojeg ćemo raditi na približavanju i usklađivanju europskog zakonodavstva i direktiva našim članovima.

Na X redovnoj Skupšti Udruženja poslodavaca Federacije u čijem su radu uzeli učešće Valentin Inzko Visoki predstavnik u BiH, Zamjenik Premijera Vlade Federacije Jerko Ivanković i Predsjedavajući Predstavničkog doma Parlamenta Federacije BiH Denis Zvizdić vođena je duga rasprava u kojoj su naši članovi iz raznih sektora govorili o problemima s kojima se susreću u svom poslovanju.

Gospodin Ivanković nam je dao čvrsto obećanje da ćemo osim poziva za prisustvo na sjednicama oba Doma Parlamenta Federacije biti uključeni i u radne grupe koje će raditi na pripremi zakona. Na taj način ćemo imati mogućnost dati puni doprinos u izradi zakona, usvajanju politika i strategija razvoja na nivou Federacije BiH.

Ova Skupština je presedan u odnosu na dosadašnju praksu u tome što su svi pozvani predstavnici međunarodnih organizacija i predstavnika zakonodavne i izvršne Vlasti bili prisutni u toku cjelokupne rasprave što do sada nikada nije bio slučaj. Ovo ulijeva nadu da će se dijalog koji vodimo sa njima kroz instituciju ekonomsko-socijana vijeća podići na viši nivo i da će se ako se ovako nastavi on pretvoriti u istinsko društveno partnerstvo.

SADRŽAJ

TEMA BROJA 4-11

- Kompanije iz BiH ostale bez libijskog tržišta
- Razgovor sa Džemailom Vlahovljakom, VD Direktor Energoinvesta
- Razgovor sa Farukom Širbegovićem, Predsjednik Širbegović Grupe
- Razgovor sa Seminom Mašićem, Direktor Hidrogradnje...

RAZGOVOR SA 12-16

- Elizabeta Josipović, vlasnica kompanije Scontoprom

NAJVAŽNIJE POSLOVNE VIJESTI 16-22

- Napredak u poslovanju rudnika koncerna EP BiH
- DP marketi iz Sarajeva otvorili prvu prodavnicu u Mostaru
- Proizvodnja namještaja...

VIJESTI IZ APBiH/UPFBiH 22-28

- Potpisani Sporazum o izmjeni Sporazuma o osnivanju Ekonomsko-socijalnog vijeća (ESV) za teritorij Federacije BiH
- Održana X redovna Skupština Udruženja poslodavaca FBiH
- Poslovanje naših BH kompanija u Libiji...

NOVE ČLANICE 28

- Suton grafička industrija, ATTP "Centroprevoz" Goražde i FEF Export/Import

PRENESENKO IZ MEDIJA 29

- Alija Remzo Bakšić, Satnica u BiH osam puta manja od evropskog prosjeka



VLASTI NEMAJU ADEKVATNE MJERE POMOĆI

“Najveći teret gubitka libijskog tržišta, snosit će radnici.”

Zbog oružanih sukoba u Libiji 22 kompanije iz BiH (18 iz Federacije BiH i 4 iz Republike Srpske) izgubile su poslove vrijedne više od milijardu eura. U periodu od početka sukoba iz Libije je evakuirano više od 1.000 radnika, dok ih je još toliko zbog godišnjih odmora, bolovanja i drugih obaveza ranije došlo iz te afričke zemlje. Prema tome, radni odnos za oko 2.000 radnika koji su radili u Libiji pod velikim je znakom pitanja. Nažalost, tu nije kraj jer prve procjene govore da su bh. kompanije angažirane u Libiji imale i veliki broj kooperanata u BiH koji su upošljavali još gotovo 2.000 radnika pa je zbog gubitka libijskog tržišta i nedostatka novih projekata u BiH i njihov daljnji angažman upitan. Ukupno libijsko tržište vrijedno je više od 200 milijardi eura godišnje, a učešće kompanija iz BiH u njemu je oko 0,5 posto.

TEMA BROJA



Džemail Vlahovljak, VD Direktor Energoinvesta

Sarajevska kompanija Energoinvest na libijskom tržištu prisutna je više od 40 godina. Sve ove godine Energoinvest je mnogo ulagao u to tržište, a imali su i zajedničku kompaniju s libijskom elektroprivredom što je ustvari bio kanal pomoću kojeg je Energoinvest dolazio do novih poslova. U ovom trenutku sarajevska kompanija potražuje oko 12,5 miliona eura, 110 miliona eura ugovorenih poslova u ovoj godini neće biti u mogućnosti realizirati, a propalo je i 40 miliona eura koji su bili pred ugovaranjem.

- Najveći teret gubitka libijskog tržišta, nažalost moram to reći, snosit će radnici. Najvjerovalnije ćemo morati uvesti jedan neradni dan koji se neće plaćati, smanjiti ćemo plate, topli obrok i ukinuti regres. To ćemo morati uraditi kako bi spriječili daljnja otpuštanja radnika. Niko ne može reći koliko će ova kriza trajati. Trenutno imamo nekoliko stotina miliona eura ponuda za poslove širom svijeta i izgledi za njihovodobivanje su veoma realni. Sasvim je moguće da u narednih

Hitna reakcija

Direktor Energoinvesta Džemail Vlahovljak kazao nam je da je ova kompanija morala otpustiti 70 radnika koji su bili uposleni na određeno vrijeme odmah nakon povratka u BiH, ali da novih otpuštanja neće biti.

mjesec dana dobijemo posao u regionu vrijedan skoro 70 miliona eura. To može bitno promijeniti cijelu situaciju. Ipak, u poslu kojim se bavi Energoinvest vrlo su dugi periodi od trenutka kada nudimo nekome posao do trenutka kada ga počinjemo realizirati. Ti periodi traju od šest do 12 mjeseci i potrebno je prebroditi to vrijeme. Radnici ove kompanije su svjesni situacije u kojoj su se našli i oni su spremni spašavati svoja radna mjesta ali i Energoinvest - kaže Vlahovljak.

Prema njegovim riječima, Libija je kao i tržište Iraka za brojne kompanije iz BiH gotova priča. Vlahovljak kaže da je Irak prije nešto više od 20 godina raj za bh. kompanije, ali da više нико не zna šta se dešava s tim tržištem. Upozorava da bi se ista stvar mogla desiti i s Libijom te da da se nikada više neće vratiti na to tržište.



U ovakvoj situaciji postavlja se sasvim logično pitanje šta država može učiniti da pomogne ovim kompanijama kako bi ublažili težak udarac. Sudeći prema trenutnoj političkoj situaciji u BiH, ove kompanije ne mogu očekivati gotovo pa nikakvu pomoć. Vijeće ministara još uvijek nije formirano i veliko je pitanje kada će se to i dogoditi. Federalna vlada tek je nedavno uspostavljena i ona još nije ni upoznata sa situacijom u kojoj se nalaze ove kompanije. Trenutno ona može dati samo moralnu podršku, jer je i budžet za ovu godinu usvojen s deficitom od 250 miliona KM, pa se s toga i ne može računati na novčanu pomoć. Svjestan je toga i direktor Energinvesta koji nam je kazao da od Federalne vlade u suštini ne očekuje nikakvu pomoć.

- Ono što očekujem je uključenje vlade u rješavanje naših problema. Svjestan sam da ni vlasti ne mogu ništa uraditi za jedan dan. Ima mogućnosti da nas angažiraju na projektu koridora Vc i na radovima iz oblasti elektroenergetskog sektora, ali za to su potrebni mjeseci prije nego što počnemo raditi. To je za otpuštene radnike puno vremena - ističe Vlahovljak.

TEMA BROJA



Faruk Širbegović, Predsjednik Grupe Širbegović

Direktor Širbegović grupe iz Gračanice, Faruk Širbegović kazao nam je da je ova kompanija u ovoj godini u Libiju trebala izvesti proizvoda u vrijednosti od 30 miliona eura, ali da je rat taj izvoz zaustavio. On je naglasio da je potrebno da vlada FBiH oformi tim kako bi se uspostavila dijagnoza stanja i sagledao obim problema. Osim toga, Širbegović kaže da kompanijama koje su izgubile libijsko tržište treba kratkoročna pomoć jer radnicima koji su bili u Libiji trebaju i očekuju hitnu pomoć i reakciju.

- Vlada FBiH mora napraviti presjek stanja, hitno intervenirati i radnicima dodijeliti makar jednu prosječnu platu u Federaciji BiH. Što se tiče dugoročnih planova, potrebno je naći način i zaposliti te radnike na javnim projektima u BiH ili na drugim tržištima. Ovo

je za našu kompaniju težak udarac ali nije nokaut - kaže Širbegović.

Što se tiče potraživanja, kompanija Širbegović -Libija, je joint venture kompanija koju su osnovali Širbegović Gračanica i njihov libijski partner, potražuje 16 miliona eura za izvršene radove u Libiji. Kompanija Širbegović Gračanica ima oko četiri miliona eura, te 100 miliona eura ugovora koji sada ne mogu biti realizirani.

- Od tih ugovora očekivana dobit iznosila bi oko 12 miliona eura. Vrijednost naše opreme koja je ostala u Libiji iznosi nešto više od deset miliona eura. Iz svega navedenog možemo zaključiti da je, ukoliko rat potraje, mogućnost štete ogromna - ističe Širbegović.



U Libiji ova kompanija prošle godine imala je 300 radnika, ali je tokom godine taj broj, zbog problema naplate potraživanja, smanjen. Prije početka sukoba, kompanija Širbegović je imala nešto više od 100 radnika i svi su evakuirani.

Širbegović kaže da bi se u budućnosti odnosi između Libije i BiH mogli pogoršati što će rezultirati slabijim angažmanom bh. kompanija u ovoj zemlji.

- BiH je u Vijeću sigurnosti Ujedinjenih nacija svojim glasom presudila i tako je usvojena rezolucija kojom je uspostavljena zona zabrane letova iznad Libije što je rezultiralo i napadom na ovu zemlju. Oni na nas više ne gledaju blagonaklono. BiH je u Libiji bila jedna od tri ili četiri države koje su bile privilegirane. Glasanje će se sigurno odraziti na naplatu naših potraživanja i na daljnje projekte naših kompanija u toj zemlji. Ne znam koliko smo u Vijeću sigurnosti imali prostora za razmišljanje, ali smo razočarali Libijce i mislim da nećemo proći bez posljedica - upozorava Širbegović.

TEMA BROJA



Semin Mašić, direktor Hidrogradnje

S druge strane, sarajevska kompanija Hidrogradnja u Libiji je prisutna više od 40 godina i u kontinuitetu je poslovala od 1968. godine. Posljednja dešavanja u Libiji tu su kompaniju jako pogodila.

- Imali smo slične probleme i 1990. kada se desio rat u Iraku gdje smo također imali slične projekte kao u Libiji. Naravno, mi se na iračko još nismo vratili, ali nismo zatvorili ni knjigu potraživanja iz te zemlje. Izgubili smo jako puno u Iraku i sada se plašimo šta će se desiti s Libijom. Istina, danas u Libiji nemamo tako vrijedne projekte koliko smo imali u Iraku gdje smo imali 1,5 milijardi dolara vrijedan ugovor na kome je Hidrogradnja radila 50 posto, dok smo s Libijom imali ugovore vrijedne 200 miliona dolara. Interesantno je da smo još toliko imali ugovora koji su trebali biti potpisani u narednom periodu. Događanja u Libiji prekinula su nas u trenutku davanja ponuda za poslove u kojima smo imali velike izglede. Sada je sve to zaledeno. U momentu

kada se ovo desilo imali smo 130 radnika koji su još 200 drugih radnika vezali svojim poslovima. Našu imovinu koja se trenutno sastoji od mašina i montažnih kuća, odnosno kampova, predali smo libijskim investitorima na čuvanje. Ako događanja u Libiji potraju duže, plašim se da bi tu imovinu mogli početi gubiti. Govoriti koliki je ukupni gubitak u Libiji u ovom trenutku je teško. Nismo još počeli računati taj gubitak. Reći ću samo da je 130 radnika imalo platni fond od 400.000 KM i to je već direktni gubitak jer ljudi ne zarađuju plate. Izgubili su radno mjesto i mi ih ovdje, u BiH, ne možemo zaposliti jer nemamo dovoljno posla. Da li će biti otpuštanja ili nekih drugih opcija rano je govoriti i to ćemo tek odlučiti. Teško se odlučujemo na otpuštanje radnike, jer neki imaju i po 25 ili 30 godina radnog staža. Bilo kako bilo, mi ćemo morati preuzeti obaveze zbrinjavanja radnika - kaže direktor Hidrogradnje.

TEMA BROJA

Alternativna tržišta



Na pitanje šta bi Federalna vlada morala učiniti kako bi pomogla kompanijama, Mašić kaže da je vlast tek formirana i da je teško očekivati bilo kakvu pomoć.

- Ja se iskreno nadam da će vlasti u BiH prepoznati težinu situacije u kojoj su se našle sve kompanije koje su radile u Libiji i da će nam na neki način pomoći da ublažimo gubitke nastale povlačenjem s tog tržišta. Ono što je potrebno učiniti svakako je davanje prednosti domaćim kompanijama na velikim infrastrukturnim projektima na domaćem tržištu. Za sve poslove koje smo radili u Libiji, ali i svuda u inostranstvu, stekli smo ogromne reference. Ipak, domaći političari to ne vide. Nizom okolnosti i zakona koje su donijeli, nama se sijeku noge. Bez tendera niko direktno ne daje poslove i mi smo osuđeni na propadanje. Mislim da je velika šansa da se na autoputu koridora Vc izvrši kompenzacija poslova za sve građevinske kompanije koje su izgubile tržište u Libiji. Potrebno je odustati od tendera kako nam strane kompanije ne bi dolazile u konkurenциju. Stranci su, kažu, uvijek povoljniji od domaćih kompanija i to je apsolutna laž. Ne mogu neke strane kompanije biti jeftinije od domaćih. To je samo mazanje očiju javnosti. Kada dobiju posao, onda zovu Hidrogradnju da im radi kao podizvođači. Naravno, pod ucjenom. Mi dobro znamo izračunati kolika je

cijena radova. Jasno se zna koliko posao košta - ističe Mašić.

On očekuje da će političke vlasti prepoznati ozbiljnost domaćih kompanija, kao i njihove potrebe i da se sklone od tendera u kojima su ravnopravni, a u stvari nisu. Mašić naglašava da sve što se danas dešava u građevinarstvu u BiH je rezultat loše politike od prije pet ili šest godina kada su vlasti počele provoditi takvu politiku. Hidrogradnja danas radi na samo dva projekta s vrlo malim obrtom kapitala.

- Postoje neke naznake da ćemo ući i u treći projekt, a to je sarajevska zaobilaznica LOT 2. To je samo jedna mrvica od cijelog projekta, a i tu nije sve čisto. Očekujem da nova Federalna vlada, naši vlasnici, prepozna domaći resurs, jer mislim da domaći izvođači ne bi napravili ovakav haos kao što je to učinila slovenska kompanija SCT. Nadam se da libijsko tržište nismo u potpunosti izgubili, a ako se to desi Hidrogradnja će biti u velikim problemima. Gubici i obaveze će se nagomilati i bit ćemo u velikom problemu kako to riješiti. Ne smijem ni posmisiliti, pored svih domaćih problema, da u potpunosti izgubimo to tržište. Nadam se da ni kriza neće dugo trajati, jer mi imamo ekipu radnika koja je spremna odmah otići nazad u Libiju. Svakodnevno vršimo telefonsku komunikaciju s našim investorima u Libiji da vidimo kako ćemo i šta ćemo u budućnosti. Ono što ćemo vrlo brzo morati uraditi je upoznavanje našeg vlasnika, Federalne vlade, s problemima. Nažalost, naš vlasnik se stalno mijenja. Sad je prelomni period zbog skorog formiranja vlasti i bit će vrlo teško izaći iz ove situacije. Očekujem da će država pomoći, jer smo mi državne firme. Ja od vlasnika tražim posao. Koliko će biti sluha, moći i novca ne znam - kaže direktor Hidrogradnje.

TEMA BROJA

Ono što je dodatni trošak Hidrogradnje je evakuacije radnika iz Libije. Mašić kaže da je on potpisao račune i garancije kako bi avion BH Airlinesa odletio u Libiju i spasio radnike.

- Sada će doći računi iz BH Airlinesa i ja ću ih prefakturisati Federalnoj vladi iako sam ja potpisao da avion leti u Libiju. Avion je otišao i nije pokupio naše radnike jer nije mogao sletjeti. Međutim, to ljude iz kompanije BH Airlines ne zanima jer je avion napravio trošak. Ja ću tražiti pomoć pa ćemo vidjeti šta će vlasti učiniti - kaže Mašić.

Vanjskotrgovinska komora BiH organizirala je prošlog mjeseca, na inicijativu građevinskih kompanija koje su radile u Libiji, sastanak na kome je prisustvovalo 14 kompanija s ciljem iznalaženja adekvatnih mjera radi prevazilaženja trenutne situacije u kojoj se kompanije nalaze. Zaključeno je da je više od 1.000 radnika suočeno s opasnošću gubitka radnih mesta, da se finansijski gubici mjere stotinama miliona eura, kao i da ne postoji nedostatak alternativnih tržišta koja bi u kratkom roku obezbijedila poslove za ove kompanije.

U skladu s tim, Vanjskotrgovinska komora BiH apelirala je na nadležne organe da hitno razmotre i iznađu mogućnost angažiranja i uključivanja domaćih kompanija iz građevinskog sektora na izgradnji autoputa koridora Vc kao i postojećim i planiranim

KOMPANIJE IZ BiH U LIBIJI

Kompanije koje su bile angažirane u Libiji su Energoinvest Sarajevo, Hidrogradnja Sarajevo, GP Bosna Sarajevo, Bosna S-OIL Sarajevo, Bosnalijek Sarajevo, MIMS Sarajevo, Finor Consulting Sarajevo, FIRMA Sarajevo, IPSA Institut Sarajevo, TTS Bihać, UMEL Tuzla, Neimarstvo Trebinje, Kosmos Banja Luka, HK Company Banja Luka, Širbegović Gračanica, Vrba Žepče, Gradip Prnjavor, ITT.

projektima energetskog sektora.

Udruženje poslodavaca Federacije BiH kategorično je i zahtijeva od nadležnih državnih i entitetskih institucija da upotrijebe sva raspoloživa i adekvatna sredstva kako bi se zaustavilo stvaranje još teže socijalne situacije i pomoglo ugroženim radnicima i kompanijama da riješe ogromne probleme nastale gubitkom tržišta u Libiji.



VANJSKOTRGOVINSKA KOMORA BOSNE I HERCEGOVINE
СПОЉНОТРГОВИНСКА КОМОРА БОСНЕ И ХЕРЦЕГОВИНЕ
FOREIGN TRADE CHAMBER OF BOSNIA AND HERZEGOVINA

TEMA BROJA



PRIVREDA LIBIJE

Pronalaskom nafte 1959. godine Libija je doživjela transformaciju iz jedne od najsiromašnijih afričkih zemalja u jednu od najbogatijih. Privreda Libije se u najvećoj mjeri, zasniva na prihodu od nafte. Nafta je skoro jedina stavka u izvozu ove zemlje, a čini oko jednu trećinu bruto nacionalnog proizvoda (BNP) i pod punom je kontrolom države. Zbog visokih prihoda od ovog sektora i malog broja stanovnika, Libija ima jedan od najviših bruto domaćih proizvoda (BDP) po osobi na afričkom kontinentu.

Početkom 1980-ih, Libija je bila jedna od država s najvećim BDP-om po glavi stanovnika, i to puno većim od mnogih zapadnih razvijenih zemalja. Devedesete godine prošlog vijeka za Libiju su predstavljale godine ekonomске krize i izolacije. Sankcije i ekonomski embargo nametnuti od strane SAD

Federalni dopremjer i ministar poljoprivrede, vodoprivrede i šumarstva Jerko Ivanković Lijanović kaže da vlada FBiH trenutno nema učinkovitih alata da ublaži posljedice i gubitke kompanija koje su radile u Libiji.

- Za kompanije bi najbolje bilo kada bi im vlada FBiH dala finansijsku injekciju, ali usvojeni budžet ima deficit od 250 miliona KM i ne predviđa takva izdvajanja - kaže Ivanković Lijanović.

Stoga je Ekonomsko-socijalno vijeće FBiH na zahtjev Udruženja poslodavaca Federacije BiH nedavno održalo sjednicu na kojoj je usvojilo zaključak prema kojem će Federalna vlada formirati interresornu grupu koja će sagledati ukupno stanje kompanija i donijeti konkretne mjere za pomoći radnicima i kompanijama.

i UN su prouzrokovale rast cijena uvoza i inflaciju, što je sve uticalo na pad životnog standarda u Libiji.

Libija ima veliku proizvodnju naftnih proizvoda, petrohemija i građevinskih materijala. Od 2002. godine, ima 12 naftnih polja s rezervama od jedne milijarde barela ili više (svaki izvor), a dva izvora s rezervama od 500 miliona do jedne milijarde barela. Više od 80 posto svoje nafte, Libija izvozi i prodaje evropskim zemljama.

Od 2003. godine privatizirano je oko stotinjak kompanija u državnom vlasništvu, najviše u području rafiniranja nafte, turizma, te poslovima vezanim za nekretnine. Sve do 1993. godine, sve libijske banke su bile državne. Tada je usvojen novi zakon o bankama koji dozvoljava osnivanje banaka u privatnom sektoru. Međutim, i pored ovog zakona kako je mali broj stranih banaka u Libiji.

RAZGOVOR SA



“Političari
u BiH
nemaju
sluha za
privredu”

Elizabeta Josipović, vlasnica kompanije Scontoprom

Tek kada se pogleda današnja pozicija prijedorskog Scontoproma može se u potpunosti shvatiti koliki je put prešla sada već jedna od najvećih kompanija u BiH. Početak je bio težak i te 1998. Godine, kada je osnovana, firma se bavila šivanjem i krojenjem presvlaka za namještaj i imala je svega tri radnika. Vlasnica i direktorica najvećeg izvoznika iz Republike Srpske, Elizabeta Josipović, u intervjuu za BH Business Info magazin kaže da je bila svjesna da posla u ratom izmorenoj državi nema i da se mora okrenuti samoj sebi i naporno raditi.

- Samo upornim radom, trudom i zalaganjem može se postići uspjeh. Ono čime se ja ponosim i što mi daje najveću snagu je što su moji sinovi već počeli preuzimati dio poslova i odgovornosti u kompaniji - kaže Josipović koja je 2004. ponijela i titulu Menadžera godine u BiH.

RAZGOVOR SA

Gospođo Josipović, možete li nam predložiti genezu rađanja Scontoproma?

- Znači, 1998. godine osnovali smo firmu čija je osnovna djelatnost bila krojenje i šivanje presvlaka za najmeštaj u kojoj je radilo tri radnika i bili smo poddobavljači za švedsku kompaniju IKEA te dobavljači za neke slovenske firme. Nakon dvije godine dobili smo direktnе ugovore za IKEA-u. Od tada smo rasli iz godine u godinu, da bi 2005. godine odlučili proizvoditi cjelokupan namještaj. Od ideje do realizacije bilo je vrlo kratko vrijeme, svega tri mjeseca. U tom periodu napravili smo tri modela kako bi izgledao naš namještaj. Otišli smo na sajam u Beograd da vidimo da li će tržiste primiti naš namještaj i na osnovu toga odlučiti da li ćemo nastaviti praviti namještaj. Reakcije su bile odlične. Posjetiocima su nas prihvatali bolje nego što smo očekivali. Došli smo kući i moj sin me pitao zašto sam tako sretna. Ja sam mu odgovorila da sam u Beogradu došla do spoznaje da ću nastaviti proizvoditi namještaj i da će naredne generacije moje porodice živjeti od ovog što ja danas radim.

Vi danas imate i vlastitu robnu marku, kao i vlastite prodavnice namještaja?

- Da. Kada smo počeli proizvodnju shvatila sam da će se moj namještaj utopiti u tuđim prodavnicama, jer ga one neće dovoljno reklamirati pa će pasti u zapećak. Odlučila sam se na skuplju i isplativiju varijantu koja je bila jako rizična. Otvoriti svoje prodavnice u Prijedoru i Banjoj Luci. Osim u ova dva grada danas imamo i prodavnicu u Sarajevu, Tuzli, Mostaru i Posušju. Moram priznati da je

otvaranje prodavnica bio vrlo dobar potez, jer one odlično posluju. Odvojili smo te firme i sada je Scontoprom proizvodna, a Urban namještaj je prodajna firma i robna marka.

Koliko danas Scontoprom ima pogona i zaposlenika?

Kompanija trenutno zapošljava blizu 600 radnika uglavnom mlađe populacije, u tri proizvodna pogona i to u Prijedoru, Prnjavoru i Sanskom Mostu. U Prijedoru je smješten glavni pogon i centrala kompanije u objektu površine 4.000 metara kvadratnih, dok se u Prnjavoru proizvodnja odvija u objektu površine 2.000 metara kvadratnih. Moram samo još napomenuti da je prosječna plaća u kompaniji viša od prosjeka u ovim granama privrede i bruto plata iznosi 600 eura



RAZGOVOR SA

Kako se Scontoprom nosi sa općom ekonomskom krizom u svijetu i BiH? Ima li otpuštanja radnika?

U toku krize nije bilo otpuštanja radnika pošto naš glavni kupac IKEA održao konstantan nivo narudžbi a i menadžment se potudio da pronađe nove kupce i ostvari nove poslovne rezultate, pošto je kompanija jako fleksibilna. Danas smo u situaciji da imamo viška posla za koji nam treba nova radna snaga, te smo u procesu obučavanja 30 radnika za tapeciranje namještaja.

Ko su partneri kompanije u BiH i u svijetu, a ko kupci?

Scontoprom sarađuje sa mnogim BH firmama kao što su Nora plast, MK Majki, Vapex i druge, te ino partnerima Omniteh Zagreb, Jaškapack, Filc Ljubljana, Bamatex Ljubljana kao i nekoliko firmi iz Turske i Italije. S druge strane, glavni kupac od osnivanja bila je švedska IKEA, zatim, italijanski Calligaris a u žadnje vrijeme ostvarili smo novu poslovnu saradnju firmama Olympia iz Engleske, Sitwell iz Meksika, Lina Design iz Slovenije i druge.

Imate li planove za širenje tržišta u narednom periodu?

- Naravno da imamo. Uskoro bi se na tržištu Engleske i Sjedinjenih Američkih Država trebao naći Urban namještaj. Prisustvovali smo poslednjem sajmu namještaja High Point Carolina u Americi i tu smo ostvarili nove poslovne kontakte te poslali prvu seriju proizvoda za to tržište. Moram reći da osvajanje ovih tržišta radimo s partnerima američkom Agencijom za međunarodni razvoj (USAID) i švedskom Agencijom za međunarodni razvoj i saradnju (Sida). U Beogradu smo otvorili novi salon i pogon za proizvodnju namještaja, u čije je opremanje uloženo oko milion maraka. Beograd će nam biti polazna tačka za osvajanje tržišta Rusije. To su naši dugoročni planovi. Imamo potrebne kapacitete, kvalitet, ali i cijenu kojom možemo konkurisati.

Gospođo Josipović, možemo li pričati o problemima za Vašu kompaniju? Šta Vam predstavlja najviše opterećenje, šta su najveći problemi?

- Nažalost, problema nikad dosta. Što se brže razvijamo, to je i problema više. Trenutno gorući problem za Scontoprom je sirovina. IKEA nam je potpuno otvorila vrata i traži od nas što veću proizvodnju. Međutim, sirovina nam predstavlja veliki problem, jer je za 30 posto skuplja nego u zemljama okruženja. Ja ne mogu biti konkurentna ako nabavljam sirovinu po takvim cijenama.





Imate li onda kakvih poticaja od države?

- Ma nemam ništa od države. Kada pričam s ljudima iz IKEA-e, govorim im kako naša drvna industrija ima velike poticaje od države, a istina je da nemamo ništa. Ja ljudima moram lagati kako bi popravila sliku stanja u privredi BiH. Država me samo sputava u dalnjem razvoju. Imate li vi predstavu koliko hala u BiH zjapi prazno? Ja im tražim da mi daju te hale besplatno kako bi proširila proizvodnju i zaposlila nove radnike. Oni mi

odgovaraju da ne mogu dati jer su papiri nesređeni, neke se nalaze na sudovima, tu su i neriješeni imovinski odnosi. Evo dobila sam jednu halu u Ključu koju moram srediti i pokrenuti proizvodnju u njoj. S druge strane, stalno nam povećavaju namete. Nedavno su nam povećali doprinose. Ja sam dogovorila posao s IKEA-om, ali ne znam kako će ga završiti. Išla sam u kalkulacije koliko mi treba za plate, doprinose... Sada je stavka za plate veća, a ja sam već ranije dogovorila cijenu posla tako da će morati iz svog džepa platiti to povećanje. Osim toga, oporezuje se topli obrok i regres. Onda zakon o radu više je nego nakaranan. Političari neće da sjednu i naprave ga kako treba. Sindikat u koji god je firmu u RS ušao ta je firma zatvorena. Niko neće da sjedne i rezimira situaciju, pa da vidi šta to ne valja i da to popravi. Neće niko ni da pita šta ne valja, šta nije u redu.

NAJVAŽNIJE POSLOVNE VIJESTI

Trgovački centar Mercator otvorio je prvi prodajni objekat na području Fojnice



Tgovački centar Mercator otvorio je prvi prodajni objekat na području Fojnice. Novootvorena trgovina u ulici ZAVNOBIH-a 1, ujedno je 20. objekat Mercatora u BiH.

Prve posjetioce i kupce dočekala je posebna akcijska ponuda uz mnogobrojna iznenađenja, promocije i degustacije.

- Želja nam je da u ovom savremenom prodajnom objektu kupcima ponudimo visok kvalitet usluge, ljubazno osoblje, kvalitetne i cjenovno konkurentne proizvode i ugodan prodajni prostor. Vjerujemo da će kupci to prepoznati i svaki put sa zadovoljstvom ponovo dolaziti u Mercator, kazao je Haris Kuskunović, direktor Mercatora BiH.

DP marketi iz Sarajeva otvorili prvu prodavnici u Mostaru



Krajem februara mjeseca 2011. DP marketi iz Sarajeva su otvorili prvu prodavnici u Mostaru, čime je ovaj, najveći domaći lanac trgovina u Bosni i Hercegovini, označio ulazak na područje Hercegovine. Svečanu vrpcu presjekli su predsjednik uprave Drvopromet grupacije Jakup Mešević i predsjednik Privredne/ Gospodarske komore FBiH Jago Lasić.

Tim povodom Mešević je istakao da su DP marketi, kao ključna članica Grupacije, i ove godine nastavili trend rasta i razvoja. U prva dva mjeseca ove godine, pored dobrih poslovnih rezultata, značajno su povećali i tržišni udio preuzimanjem 17 prodavnica u Unsko – Sanskom kantonu, otvaranjem dvije prodavnice u Sarajevu i jedne u Maglaju, a da je market u Mostaru samo prvi u nizu koje planiraju otvoriti na ovom području.

- Ovo je ne samo značajan korak na putu ostvarenja naše vizije da budemo broj jedan domaći lanac trgovina u BiH već i veliki doprinos bh. ekonomiji i našem opredjeljenju da podržimo domaću proizvodnju. Vjerujemo da će i građani Mostara, kao što su i u drugim gradovima u kojima smo prisutni, biti zadovoljni ponudom i uslugom DP marketa i da ćemo dugoročno poslovati na obostrano zadovoljstvo.

Kao društveno odgovorna kompanija, Drvopromet grupacija je, ovom prilikom, potpisala ugovor o sponzorstvu Skokova sa Starog mosta sa Klubom „Mostari“ s ciljem da podrži ovu tradicionalnu turističko- sportsku manifestaciju koja je simbol grada sa Neretve.

Prevoz veći od planiranog (ŽELJEZNICE FBIH)



Uprkos svim poteškoćama, 2010. godina bila je uspješnija od prethodne, a premašen je i planirani obim prevoza. Prevezeno je 7. 926.603 tone robe, 10% više nego u 2009. godini i za 8% više od plana. Ostvareno je 856. 328.237 ntkm, za 22 % više nego prošle godine i 1% više od planiranog.

Kako je bilo moguće ostvariti ovako dobre rezultate u godini koja je bila prepuna svega, od planiranih zatvora pruge zbog remonata, neplaniranih vanrednih događaja do nelegalne obustave rada? Za odgovor smo se obratili Službi za izradu i izvršenje reda vožnje ŽFBiH.

-Kako? To najbolje znamo mi dispečeri, svi, od glavnih, saobraćajno-kolskih, mašinskih pa do elektrodispečera- kaže inženjer Mehmedalija Šanta, glavni dispečer ŽFBiH, te dodaje: - Svega je bilo u ovoj godini. Remont na južnoj pruzi, remont u ŽRS-u, odroni, svakodnevno probijanje zatvora pruge, učestali defekti lokomotiva, „izbacivanja“ napona i kidanje kontaktne mreže ulijed jakih vjetrova, te plavljenje tunela Jedrinje. I na kraju ono najgore, šestodnevna nelegalna obustava rada od strane mašinovođa i potpuna blokada željezničkog saobraćaja. Ne računajući rat, ne pamtim da su se željeznice i željezničari našli u težoj situaciji. Kako je samo bilo teško ponovo ušpostaviti saobraćaj i podmiriti potrebe velikih sistema koji su se našli pred totalnim kolapsom? I što je najvažnije, održati zadovoljavajući nivo bezbjednosti željezničkog saobraćaja. Sve ovo ne bi bilo moguće bez maksimalnog angažmana ljudi iz grupe za eksploraciju vagona u poslovnim područjima i izvršnog osoblja na terenu. Malo više profesionalizma i ozbiljnosti u poslu, a rezultati dolaze sami. I naravno, *samo da štrajkova ne bude*- kaže na kraju uvijek raspoloženi Šanta koji na željeznici radi od 1967. godine.

U pogonima ArcelorMittal Zenica u 2010. godini proizvedeno je 590.000 tona čelika



U pogonima ArcelorMittal Zenica u 2010. godini proizvedeno je 590.000 tona čelika, što je u poređenju sa 2009. godinom neznatno povećanje.

Kako je izjavila Dijana Božić-Srđanović, portparol ArcelorMittal Zenica, u prošloj godini na tržište je plasirano ukupno 580.000 tona proizvoda od čelika.

„Na tržište zemalja Balkana, Evropske unije i sjeverne Afrike izvezeno je 55 odsto proizvoda, dok su ostale količine plasirane na tržište širom BiH”, izjavila Dijana Božić - Srđanović, portparol AMZ.

NAJVAŽNIJE POSLOVNE VIJESTI

Napredak u poslovanju rudnika koncerna EP BiH



Sadašnja situacija, razvojni projekti i trenutno otvorena pitanja razvoja zavisnih društava Koncerna Elektroprivrede BiH, rudnika Kreka, Đurđevik, Kakanj, Breza, Zenica, Gračanica i Abid Lolić iz Bile bile su, između ostalih, teme današnjih razgovora u Elektroprivredi BiH.

Sastanku su prisustvovali članovi Uprave EPBiH, na čelu sa generalnim direktorom **Amerom Jerlagićem**, predsjednici sindikata pomenutih rudnika, te predsjednici granskih sindikata BiH i Federacije BiH.

Tokom rasprave konstatovano je da je vidljiv napredak u poslovanju rudnika od kako su u sastavu Koncerna ali i da se moglo učiniti i više.

Određeni zastoji u dokapitalizaciji rudnika, opšti je zaključak, rezultat su, prije svega, u složenosti Zakona o javnim nabavkama i njegovoj primjeni.

Ipak, i pored brojnih poteškoća, nerijetko iz političkih razloga, može se biti zadovoljno realizacijom prve faze dokapitalizacije a posebno je naglašeno da je ova godina prelomna za dugoročni razvoj rudnika od kojih se, u najskorije vrijeme, očekuje da samoodrživo posluju, u čemu će imati stalnu pomoć i podršku vladajućeg društva EPBiH.

Uprava EPBiH podržava opravdane zahtjeve za poboljšanjem položaja rudara te je dogovoren da se u narednih deset dana Uprava EPBiH sastane sa direktorima svih sedam rudnika u sastavu Koncerna kako bi se pokušali iznaći modaliteti koji bi uticali na poboljašnje položaja rudara.

Dogovoren je i slijedeći sastanak Uprave EPBiH sa predsjednicima sindikata rudnika koji bi se trebao održati do 10. aprila, saopšteno je iz EPBiH.

Preventovo rješenje za Visoko

Kompanija Prevent planira izgradnju postrojenja za termički tretman organskog otpada u krugu fabrike Prevent Leather u Visokom vrijednog 6,5 miliona KM koje bi trebalo zadovoljiti potrebe za zbrinjavanjem organskog otpada iz fabrike Prevent Leather.

To bi bio prvi ovakav projekt u BiH, a osim otpada kompanije Prevent Leather, u spalionici bi bilo moguće spaljivati i organski otpad iz mesne industrije sa područja Visokog.

Tim povodom, juče je, u organizaciji Ministarstva okoliša i turizma FBiH održana javna rasprava kojoj su prisustvovali predstavnici općinske administracije i nevladinih organizacija, stanovnici naselja koji gravitiraju području gdje će postrojenje biti izgrađeno, predstavnici proizvođača opreme za postrojenja za termički tretman organskog otpada iz italijanske kompanije BRU Impianti, te predstavnici kompanije Prevent.

NAJVAŽNIJE POSLOVNE VIJESTI



„Povod današnje javne rasprave jeste da u saradnji sa građanima Visokog i kompanijom Prevent obezbijedimo kvalitetno rješenje za izgradnju ovog postrojenja koje bi bilo izgrađeno po strogim ekološkim standardima i zadovoljavalo Zakon o okolišu FBiH. Današnja rasprava je prvi korak ka dobijanju okolinske dozvole“, rekla je **Rasema Ćatović**, sekretar federalnog Ministarstva okoliša i turizma.

Javna rasprava je pokazala da se glavne zamjerke građana odnose na eventualno spaljivanje komunalnog otpada u ovom postrojenju, no, ta bojazan je otklonjena

pojašnjnjem da bio tretiran isključivo otpad organskog porijekla koji ima visoku energetsku vrijednost.

Radi se, u svjetu zaživljenom modelu zatvorenog procesa spaljivanja i proizvodnje toplotne energije, koji je potpuno ekološki prihvatljiv.

„Izgradnja ovakvog jednog postrojenja bi morala zadovoljiti sve stroge ekološke standarde Evropske unije i morala bi biti u skladu sa pravilnicima o graničnim vrijednostima emisije gasova. U svakom slučaju, izgradnja ovog postrojenja predstavlja prioritet“, kaže **Jovan Sredojević** sa Mašinskog fakulteta u Zenici, koji je i autor studije o izgradnji spalionice.

Proizvođač opreme za ovu postrojenja je italijanska kompanija BRU Impianti, koja ima 40 ovakvih spalionica širom svijeta, a najpoznatija je ona u švicarskom St. Moritzu.

Riječ je o postrojenju smještenom u ekskluzivnom hotelu, a koji svojim radom, prema svim urađenim analizama, nije izazvao nikakve zdravstvene probleme za građane ovog ekskluzivnog turističkog mjesta, a koje termicki obradjuje otpad u mnogome složeniji po svojoj strukturi od organskog otpada za koji je projektovano postrojenje u Visokom.

Proizvodnja namještaja



Rast uprkos lošem poslovnom okruženju, nepostojanju zakonske regulative, izostatku pomoći države, velikim finansijskim opterećenjima, skupoj električnoj energiji, kao i problemima s kvalitetnom nabavkom i cijenama

Proizvodnja namještaja i drugih finalnih proizvoda drvne industrije u Federaciji BiH za 2010. bilježi rast u odnosu na 2009. godinu.

„Rast je zabilježen uprkos lošem poslovnom okruženju, nepostojanju zakonske regulative, izostatku pomoći države za pripremu proizvodnje za izvoz namještaja, velikim finansijskim opterećenjima, skupoj električnoj energiji, kao i problemima s kvalitetnom nabavkom i cijenama trupaca“, kazala je Feni sekretarka Grupacije šumarstva i drvne industrije Privredne komore Federacije BiH Šemsu Alimanović.

NAJAVAŽNIJE POSLOVNE VIJESTI



Semiz Šišić, Direktor Metalno Zenica

Metalno Zenica ugovorilo poslove za 2011. godinu u iznosu 25 miliona KM

Članica Udruženja poslodavaca u FBiH kompanija „Metalno“ Zenica, koje upošljava oko 450 radnika, ugovorilo je poslove za cijelu 2011. godinu pri čemu se ukupna vrijednost procjenjuje na oko 25 miliona maraka, potvrdio je **Semiz Šišić**, direktor preduzeća.

Nešto ugovora prenijeto je iz 2010. godine, a naše opredjeljenje je evropsko tržište, prije svega Njemačka, Švedska, Norveška i Austrija.

U Švedskoj isporučujemo čelik za Arenu u Štokholmu i do sada smo plasirali 700 od ukupno predviđenih oko 5 hiljada tona. Što se tiče domaćeg bh tržišta, malo je posla, ali se i ne trudimo, jer vladaju niske cijene, kazao je Šišić.

Semizu Šišiću, dodijeljeno je ovogodišnje javno priznanje „Nagrada Zenice“, za izuzetne rezultate u oblasti metaloprerade, te razvoju privrednog društva „Metalno“ i afirmaciji Zenice u BiH i svijetu.

VIJESTI IZ APBiH/UPFBiH

Potpisan Kolektivni ugovor o izmjenama kolektivnog ugovora o pravima i obavezama poslodavaca i zaposlenika u oblasti prometa za teritoriju FBiH



Federalni Ministar prometa i komunikacija gosp. Nail Šećkanović, predsjednik Grupacije poslodavaca u oblasti prometa pri Udruženju poslodavaca u FBiH gosp. Nedžad Siočić i Predsjednik Sindikata prometa u FBiH gosp. Bejto Kačar potpisali su 02.03.2011. godine u Zenici Kolektivni ugovor o izmjenama Kolektivnog ugovora o pravima i obavezama poslodavaca i zaposlenika u oblasti prometa za teritoriju FBiH.

Potpisan Sporazum o izmjeni Sporazuma o osnivanju Ekonomsko-socijalnog vijeća (ESV) za teritorij Federacije BiH

Premjer Federacije BiH Mustafa Mujezinović, predsjednik Saveza samostalnih sindikata BiH Ismet Bajramović i predsjednik Udruge poslodavaca FBiH Nihad Imamović potpisali su u sjedištu Federalne vlade u Sarajevu, Sporazum o izmjeni Sporazuma o osnivanju Ekonomsko-socijalnog vijeća (ESV) za teritorij Federacije BiH. Na ovaj način realizirana je inicijativa Federalne vlade, pokrenuta protekle godine, radi stvaranja uvjeta za učinkovitiji rad ESV-a.



Potpisivanjem ovog kolektivnog ugovora realizirana je inicijativa Grupacije pri Udruženju poslodavaca u FBiH za izmjene stava 5. člana 60. Kolektivnog ugovora o pravima i obavezama poslodavaca i zaposlenika u oblasti prometa za teritoriju FBiH, pokrenuta prošle godine.

Izmjene kolektivnog ugovora, rezultat su potpunog konsenzusa socijalnih partnera o potrebi zadržavanja postojećeg nivoa zaposlenosti u kompanijama iz oblasti cestovnog prometa te poštivanja stečenih prava zaposlenih i stvaranja mogućnosti koje poslodavcima iz ove djelatnosti omogućavaju puno poštivanje svih odredbi kolektivnog ugovora.

Drugačije rješenje dovelo bi do toga da najveći broj kompanija iz ove oblasti ne bi mogao poštivati odredbe kolektivnog ugovora što bi rezultiralo masovnim otpuštanjem i gašenjem velikog broja kompanija ili djelova kompanija.

U vremenu kada smo svjedoci negativnih posljedica globalne ekonomske krize i recesije u bh ekonomiji, koji su se najviše odrazili na djelatnost saobraćaja, socijalni partneri su pokazali izrazitu društvenu odgovornost te nezamjenjivost ekonomsko-socijalnog dijaloga u rješavanju nagomilanih problema u društvenom i poslovnom okruženju u našoj državi.

VIJESTI IZ APBiH/UPFBiH

Naime, sukladno izmijenjenim Sporazumu, ESV čini 21 član, odnosno po sedam predstavnika svakog od tri socijalna partnera.

Uz premijera, članovi ESV-a uime Vlade FBiH su federalni dopremijer i ministar financija, te federalni ministar rada i socijalne politike, zatim energije, rudarstva i industrije, prometa i komunikacija, trgovine, te poljoprivrede, vodoprivrede i šumarstva.

Kada je riječ o Sindikatu i Udrizi poslodavaca, njihovi članovi ESV-a predsjednici su grupacija unutar ovih asocijacija.

Inače, socijalne partnere, prema odredbama izmijenjenog Sporazuma, predvode premijer FBiH, predsjednik Saveza samostalnih sindikata BiH i predsjednik Udruge poslodavaca FBiH. Međutim, iako je broj njegovih članova povećan, proračunska izdvajanja za rad ESV-a će, sukladno mjerama štednje, biti smanjena, kazano je nakon današnjeg potpisivanja Sporazuma. Ujedno, novi sastav ESV-a omogućava pokrivanje svih oblasti bitnih i za socijalni dijalog, i za usuglašavanje zakonskih rješenja nužnih za proces evropskih integracija. Bitno je što će, zbog izravnog uključivanja federalnih ministara u rad ESV-a, biti omogućeno lakše usvajanje usuglašenih zakonskih prijedloga na samoj Vladi FBiH.



Održana X redovna Skupština Udruženja poslodavaca FBiH



Dana 28.03.2011. godine u prostorijama ASA- Holding u Sarajevu je održana 10. redovna Izvještajna Skupština Udruženja poslodavaca Federacije BiH. Na dnevnom redu Skupštine su razmatrani Izvještaji o radu UO UPFBiH, Izvještaj o radu delegacije ESV-a, Finansijski izvještaj Udruženja za 2011.godinu, kao i prijedlog Programa rada i Finansijski plan udruženja za ovu godinu.

Skupštini su prisustvovali preko 50 najuspješnijih kompanija iz FBiH koji su prisutne goste predstavnike izvršne i zakonodavne vlasti upoznali sa problemima sa kojima se susreću u praksi.

Skupštini su pored članova Skupštine prisustvovali i predsjednik Saveza samostalnih sindikata BiH Ismet Bajramović, visoki predstavnik u BiH Valentin Inzko, zamjenik federalnog premijera Jerko Ivanković Lijanović, Predsjedavajući Predstavničkog doma Parlamenta FBiH Denis Zvizdić te predstavnici komora i drugih institucija sa kojima Udruženje usko sarađuje.

VIJESTI IZ APBiH/UPFBiH



Na početku Skupštine, prisutnim poslodavcima obratio se NJ. E. Visoki predstavnik za BiH Valentin Inzko koji je istakao da poslodavci imaju najveći interes da apeliraju na političare da riješe probleme u BiH.

"Povjerenje je ono što je ključno u biznisu i političari bi se mogli ugledati na biznismene", rekao je Inzko.

Prema njegovim riječima, privrednici u BiH rade u teškim uvjetima, zemlja još nema zakon o obligacionim odnosima, što otvara prostor za birokratiju i konfuziju, još nema jedinstvenog tržišta, pa su privrednici prinuđeni raditi na malim i neprofitabilnim tržištima, a nepovoljno poslovno okruženje rezultira gubitkom investicija. Dalje je istakao je da u BiH mora biti riješen niz problema poput kreiranja jedinstvenog ekonomskog tržišta te nedostatak ekonomskog lobiranja za investicije u BiH.

"BiH i njene institucije moraju biti fokusirani prvenstveno na ekonomiju i pravnu državu", rekao je Inzko.



poslodavcima se obratio i zamjenik premijera Federacije BiH Jerko Ivankačić koji je ponudio pomoći poslodavcima ističući da će Vlada FBiH biti na usluzi

poslovnom sektoru.

"Mi već pregovaramo o ukidanju doprinosa na plaće u proizvodnji, a u narednom periodu pokušat ćemo osigurati i svjež kapital te intenzivno raditi na promjeni vanjskotrgovinske politike kao i porezne politike", dodao je Ivankačić.



Predsjedavajući Predstavničkog doma Parlamenta Federacije BiH Denis Zvizdić stava je da je neophodno napraviti temeljnju analizu postojećih strategija i zakona te pozvao poslodavce da se intenzivno uključe u ovaj proces.



Članove Skupštine je pozdravio i Ismet Bajramović koji je istakao da je cilj Sindikata da dopriene se poboljšanju poslovne klime u BiH kako bi se konačno prekinulo otpuštanje radnika i počeli ljudi zapošljavati.

VIJESTI IZ APBiH/UPFBiH

Nakon obraćanja gostiju i diskusije poslodavaca koji su u svom obraćanju gostima istakli najveće probleme sa kojima se susreću Skupština je razmatrala materijale koji su se nalazili na dnevnom redu.

Izvještaj o radu UO UPFBiH je ocijenjen izuzetno visoko. U izvještaju o radu je posebno naglašen rad Stručne službe koja je dala ogroman doprinos i uradila veliki dio posla u radu UPFBiH. Također je istaknut i rad delegacije ESV-a koja je aktivno učestvovala kako u pripremama materijala tako i u samom radu na sjednicama ESV-a. Dalje, u Izvještaju je naglašena bolja saradnju sa sredstvima javnog informisanja od kojih je UPFBiH imalo podršku u aktivnostima.

Skupština je ocijenila da Program rada UPFBiH previše ambiciozan, ali da ukoliko Udruženje želi napredovati i ostvariti ciljeve Program rad mora biti ambicozan. U programu rada je istaknuto da UPFBiH očekuje i dalje aktivan rad ESV-a a posebno aktivan rad od strane Vlade FBiH kao jednog od socijalnih partnera budući da je do sada nedostajala aktivnost Vlade FBiH za razliku od druga dva socijalna partnera koji su dali izuzetan doprinos.

Kroz finansijski plan moglo se uočiti da će u narednom periodu budžet UPFBiH biti povećan kako bi se mogli angažovati i stručnjaci za analize i na taj način poboljšati rad Udruženja .

Na Skupštini su također potvrđene i Odluke o imenovanju tri nova člana UO UPFBiH. Skupština je potvrdila imenovanje Franje Milosa (Hous Milos doo) , Ante Sutona (Suton doo) i Harisa Kuskunovića (Merkator doo).

Obzirom da je mandat Predsjednika Skupštine i dva zamjenika predsjednika Skupštine 1 godinu, Skupština je reimenovala Predsjednika i dva zamjenika predsjednika Skupštine.



Poslovanje naših BH kompanija u Libiji



Shodno zaključku sa vanredne sjednice ESV-a koja je održana 29.03.2011. godine na kojoj se raspravljalo o stanju privrednih subjekata iz FBiH koji su poslovali u Libiji. Na zahtjev Udruženja poslodavaca Federacije BiH osnovana je međuresorna interventna skupina koju čine predstavnici federalnih ministarstava energije, rudarstva i industrije, rada i socijalne politike i prometa i komunikacija, kao i predstavnici socijalnih partnera i kompanija koje su angažirane u Libiji.

Zadatak skupine je utvrđivanje

stvarnog stanja u vezi šteta koje su kompanije pretrpjеле zbog rata u Libiji, što će biti osnova za predlaganje mera.

Kompanije iz FBIH koje su poslovala u Libiji, interresornoj grupi će dostaviti kompletirane podatke koji se odnose na:

- Broj povučenih radnika iz Libije
- Obaveze prema radnicima
- Nastale štete
- Likvidnost kompanija
- Predložiti konkretne mjeru Vladi FBIH radi prevazilaženja trenutnog stanja.

Federalno ministarstvo energije, rudarstva i industrije će, prema zaključku Vlade, i dalje pratiti i analizirati stanje u gospodarstvu, s naglaskom na gospodarska društva koja su ostala bez okončanih ugovornih obveza u ratom zahvaćenoj Libiji.

Prvi matchmaking između privrednika R Slovenije i BiH

Ambasada Republike Slovenije, Slovenski poslovni krug , USAID Farma u saradnji sa Asocijacijom poslodavaca BiH su krajem marta mjeseca 2011.godine organizovali matchmaking-druženje privrednih subjekata u oblasti prehrambene industrije iz Republike Slovenije i Bosne i Hercegovine.

Ovom bilateralnom susretu privrednika prisustvovali su i NJ.E. Andrej Grasselli, Iztok Gornik, Predsjednik U.O. SPK, Janja Kokolj Prošek, MKGP R Slovenije i Nihad Imamović, Predsjednik U.O. APBiH. Nakon druženja organizatori su upriličili svečani prijem u okviru FineWine&GoodFood SALON-a 2011.



SUTON grafička industrija



Štamparija SUTON relativno je novo ime među subjektima. No grafičkom djelatnosti ova kompanija se bavi već 17 godina, najduže kroz ime Hercegtisak.

Hercegtisak se 1. januara 2005. podijelio na proizvodnju i trgovinu. Proizvodnja, odnosno štamparija, je organizovana u Suton d.o.o., po osnivaču Hercegtiska Anti Sutonu. Trgovina školskim i uredskim artiklima ostala je u Hercegtisku, a on se kasnije pripojio poznatoj austrijskoj grupaciji Europapier i danas posluje pod imenom Europapier-Hercegtisak.

ATTP "Centroprevoz" d.o.o. Goražde

Osnovna djelatnost ATTP "CENTROPREVOZ" doo Goražde je prevoz putnika. Pored prevoza putnika preduzeće se bavi i turističkim aranžmanima.

Osnovni cilj i zadatak firme Attp "Centroprevoz" je pružanje usluga prijevoza na širem području BiH, a u skladu sa domaćim propisima koji uređuju ovo oblast. Attp "Centroprevoz" svojim korisnicima usluga pruža najbolje što njihovi kapaciteti omogućavaju u oblasti prijevoza u međugradskom i prigradskom saobraćaju. Ovo društvo ima stručno osposobljene kadrove kao uslov povećanja zadovoljstva i kvaliteta pruženih usluga.



FEF Export/Import d.o.o.



FEF Export/Import uvozi i gradi uredski namještaj po najvišim Evropskim standardima sigurnosti i udobnosti. FEF Export/Import nudi granciju za domaće i uvozne proizvode budući da su građeni po visokim Evropskim sigurnosnim standardima. FEF raspolaže timom stručnjaka za unutrašnje uređenje koji su uvijek spremni da na najefikasniji način organizuju i urede poslovni prostor.

PRENESENKO IZ MEDIJA

Satnica u BiH osam puta manja od evropskog prosjeka

BANJALUKA - Za najnižu satnicu u BiH, koja iznosi 1,9 maraka, koliko za sat vremena svog rada zarade tekstilni radnici, mogu sebi da priušte samo hljeb i 50 grama čajne kobasicice ili paklo "boljih" žvakačih guma.

Za kilogram mesa, koji košta oko 16 maraka, radnik u tekstu u BiH treba da radi čitav dan, a za kilogram banana i litru soka čitava dva sata.



Do najniže satnice smo došli tako što smo prosječnu platu podijelili sa 176, odnosno s prosječnim brojem radnih sati u jednom mjesecu.

U Evropi prosječna minimalna satnica iznosi 16,5 KM i osam puta je veća od satnice u BiH.

Najviša satnica u Evropi u prošloj godini bila je u Norveškoj, gdje se sat rada prosječno plaćao 80 KM, a najniža u Bugarskoj – 4,2 KM.

Danko Ružićić, predsjednik Sindikata teština, kože i obuće RS, ocijenio je da je BiH daleko ispod evropskog minimuma u svakom smislu.

"Mi smo ratifikovali međunarodne konvencije o radu i trebalo bi da se toga i pridržavamo. Po tim konvencijama bi trebalo da najniža plata ne bude ispod 60 odsto prosječne plate, ili da imamo četiri nedjelje godišnjeg odmora, što je kod nas misaona imenica", naveo je Ružićić.

Alija Remzo Bakšić, direktor Asocijacije poslodavaca BiH, istakao je da je glavni uzrok problema u teštinoj industriji u BiH taj što ta preduzeća ne ulažu dovoljno u promociju svojim brendovima kako bi postali konkuretni.

"U drugim granama privrede, izuzev trgovine, nije tako loša situacija. I u trgovini, gdje radnici pristaju raditi za minimalna primanja samo da bi dobili posao, je loša situacija", kazao je Ramzo Bakšić.

On je kazao da je najbitnije da se kreće u preispitivanje privatizacija i prestrukturiranju preduzeća.

Zorislav Stojić, predsjednik Udruženja poslodavaca teštine i kožarskoprerađivačke industrije RS, je kazao da je u RS satnica u ovoj oblasti nešto viša od dvije marke i da pored toga radnici imaju još i topli obrok i regres.

"To možda izgleda malo kada se pogleda, ali moramo znati da ne dobijaju svi radnici minimalnu platu. Isto tako u boljoj smo poziciji od nekih zemalja iz okruženja. U Srbiji, na primjer, minimalna plata iznosi 305 maraka, tek sada rade na povećanju na 320 maraka", istakao je Stojić.

Udruženje ekonomista RS SWOT